

A CONTAMINACIÓN LUMINOSA:

UN NOVO XEITO DE POLUCIÓN NA SOCIEDADE DE CONSUMO

FINS IGLESIAS SANTAMARIA*

Para a un grande número de habitantes dos actuais núcleos urbanos resulta case imposibel a contemplación do firmamento estrelado, a menos que se decidan a percorrer longas distancias afastando-se da cidade.

Un espectáculo natural que até hai pouco estaba ao noso alcance, fica-nos agora furtado por mor da contaminación luminosa que producen as vilas e cidades. É máis, se cadra estamos xa afeitos a ver un ceo sen estrelas e coidamos que é o normal. Mais isto non foi sempre así: Houbo un tempo no que ver moitas estrelas dende unha cidade non era raro, senón bastante habitual. Daquela producir e consumir enerxia eléctrica era caro, e a enerxia aproveitába-se para iluminar só o preciso.

Hoxe, os méios de produción de electricidade mudaron e tamén as necesidades e os usos da sociedade consumista. Dispoñemos dunha inxente cantidade de enerxia, un ben de primeira necesidade que malgastamos como se non fora tal onde non se precisa, nomeadamente no ceo.


QUÉ É E CÓMO SE PRODUCE A CONTAMINACIÓN LUMINOSA:

Esta enerxía desperdiaciada, a luz emitida polos sistemas de alumeadoo cara o ceo, é a causante da contaminación luminosa. Manifesta-se na forma dun resplandor producido contra o fondo natural do ceo, debido á reflexión e difusión da luz nos gases e partículas do ar.

Tal resplandor diminue o contraste das estrelas co fondo do ceo impedindo-nos a contemplación dos obxectos más febles, e nalgúns casos mesmo dos astros más brillantes. Deste xeito, moitas persoas endexamais ollarán a luz zodiacal nos equinocios, nin seguirán o camiño da Via Láctea polo ceo cos seus magníficos cúmulos e nebulosas.

Mais este argumento, defendido polos profesionais e afeizoados da Astronomía, non é o único: Esta-se a gastar máis enerxía da precisa para iluminar racionalmente aqueles espazos que certamente a necesitan.

Non se trata de deixar as rúas ás escrás, tan só de aproveitar millor un recurso



Imaxe de satélite da Península Ibérica pola noite onde se aprecia a luz emitida cara o ceo. (CONTAMINACIÓN LUMINOSA).

cujo consumo pagamos todos. Por iso, moitas asociacións astronómicas e ecoloxistas estamos a nos preocupar por concienciar á ciudadanía e aos responsábeis públicos do bon aproveitamento da enerxía luminosa.

CÓMO REDUCIR O SEU IMPACTO: MEDIDAS E ACTUACIÓNS.

Para producir a menor cantidade posíbel de contaminación luminosa, cómpre eliminar as causas que a producen. Básicamente hai dous xeitos de enviar luz cara o ceo: A reflexión nas superficies iluminadas e a emisión directa.

A reflexión ten un impacto dez veces menor que a emisión. Non é posíbel eliminar totalmente esta componente, mais sí reducila evitando excesivos niveis de iluminación, ou rebaixando estes cando a actividade se reduce ao mínimo. Tamén diminúen os índices de reflexión apantallando as superficies iluminadas ou pintando estas de cores más escuras.

O impacto da iluminación directa é o principal factor da contaminación luminosa. Prodúcenlo os focos do alumeadoo público e a iluminación exterior dos edificios con elevada inclinación sobre da horizontal ($>20^\circ$). Especialmente contaminantes, polas suas características e contínua proliferación, son as farolas con forma de globo e demás iluminación suntuaria.

Os seus efectos poden eliminarse totalmente apantallando as luminárias e dirixindo a luz onde se precisa. Asemade, nas horas de menor actividade na via pública

podería rebaixarse a intensidade luminosa ou mesmo apagar algúns puntos de luz. Os rótulos publicitarios deberían apagarse fóra do horario comercial, e no caso dos locais nocturnos re-dirixir o fluxo cara abaixo que é onde os usuários e usuárias os van perceber.

A posta en marcha destas medidas supón como mínimo un aumento do 25% na iluminación da via pública para un mesmo tipo de lámpada. Isto permite reducir o número de luminárias ou o consumo destas, mantendo os mesmos niveis de iluminación cun gasto eléctrico entre un 40 e un 60% menor.

Por outra banda, os distintos tipos de lámpadas teñen diferente incidencia sobre da contaminación lumínica: As de vapor de mercurio de alta presión son as más contaminantes e teñen un baixo rendemento cromático. En troques, as de vapor de sódio de baixa presión son pouco contaminantes e non producen refugos tóxicos.

CONCIENCIACIÓN CIDADÁ E INICIATIVAS LEGAIS.

O Ajuntament de Tàrrega (Lleida) foi o primeiro en aprovar unha ordeanza municipal para a protección do ceo escuro. Hoxe son máis os concellos que teñen xa tomado iniciativas para reducir a contaminación luminosa. En todos os casos, as iniciativas partiron de asociacións astronómicas e ecoloxistas, acadando resposta entre os responsábeis públicos máis polo aforro económico e reclamo eleitoral que supoñen, que pola defensa do dereito de todos e todas a un ceo escuro.

De calquera xeito, cómpre que as organizacións sensíbeis a esta problemática pulemos por concienciar á cidadanía de que un dereito está-nos sendo furtado, e polo tanto debemos reclamalo tal como o facemos con calquera outro dereito ambiental, perante os organismos públicos.

Acompaña a este artigo un manifesto


elaborado por todas as asociacións astronómicas nas xornadas estatais do '98 en Castelló. Serve para dar a coñecer aos concellos a nosa preocupación sobre deste problema, e reclamar solucións mediante a aprobación de ordeanzas ou normativas municipais.

A este respecto, os compañeiros e com-


pañeiros de ADEGA-Barbanza disponemos dun modelo de ordeanza municipal que con pequenas modificacións, pode adaptar-se e presentar-se nos concellos interesados.

*LICENCIADO EN CIÉNCIAS XEOLÓXICAS.
MEMBRO DE ADEGA-BARANZA.
PRESIDENTE DA SOCIEDADE ASTRONÓMICA
DO BARANZA.


1.- ORIENTACIÓN E APANTALLAMENTO DAS LUMINÁRIAS




2.- CLASES DE LUMINÁRIAS DE USO VIAL



3.- SITUACIÓN DOS REFLECTORES DA ILUMINACIÓN SUTUÁRIA



4.- ÁNGULOS DOS REFLECTORES NAS ÁREAS PEONAIAS E DE LECER



MANIFESTO CONTRA A CONTAMINACIÓN LUMINOSA E EN DEFENSA DO CEO ESCURO

Na fin deste século a sociedade industrial ten acadado un elevado nivel de progreso sócio-económico a costa da sobre-exploitation dos recursos naturais. Mais por sorte cada vez son máis as persoas comprometidas coa defensa da natureza ocupadas en loitar contra os diferentes tipos de contaminación. Na miña condición de cidadá/án sensible a este problema, veño de denunciar un novo tipo de alteración méio-ambiental: A contaminación luminosa producida por sistemas de iluminación nocturna pouco eficientes.

A contaminación luminosa é básicamente luz dirixida cara o ceo dende sistemas de alumeadoo que deitan parte do fluxo luminoso porriba da liña do horizonte. Un exemplo claro son as farolas en forma de globo, que perden o 50% da luz cara o ceo. Outro son-o as farolas inclinadas con transparente abombado, que deixan fuxir porriba do horizonte dun 30% a un 40% do seu fluxo luminoso.

Esta luz que se perde non cumpre o obxectivo para o que foi instalada: A via pública e os/as cidadáns ou os/as automobilistas. Por outra banda, esta luz supón un gasto enerxético engadido: Cálculos do Instituto Astrofísico de Canarias amosan un 30% ou máis de enerxía perdida a causa do deficiente apantallamento dos sistemas de alumeadoo público. O ideal é que a máxima porcentaxe de enerxía consumida se aproveite para a fin á que foi destinada, polo que cómpre aumentar a eficiencia no consumo enerxético.

Por outra banda, o ceo nocturno alterado pola luz inútilmente dirixida cara arriba impide-nos a contemplación do firmamento estrelado. Dende sempre a humanidade mirou

cara o ceo de noite prantexando-se moitas interrogantes: As grandes cuestións da Ciéncia e da Filosofía teñen a súa orixe na contemplación dun ceo escuro ateigado de estrelas.

O saber situarmo-nos na nosa acaida dimensión a través da contemplación do universo é un exercicio máis que saudábel. Atopar-mos a propia perspectiva no Cosmos é tamén imprescindible. Se cadra iso axudaria-nos a sermos máis humanos/as e máis respeituosos/as cos demás seres vivos. Pola contra, a falla dun ceo estrelado rebaixa-nos a unha realidade pouco trascendental, na que os anceios por responder ás grandes cuestións existenciais fican a miúdo substituídos por horas de mensaxes televisivas.

É preciso preservar o valor da noite estrelada tal como a ollaron os nosos devanceiros para nós e as vindeiras xeracións. Temos dereito a contemplar un espectáculo natural que até hai moi poucos anos estaba ao noso alcance, sen necesidade de percorrer dúcias de quilómetros fuxindo da "civilización".

A contaminación luminosa é unha alteración que polo de agora non ten provocado un estado de opinión, porque é moi nova e pouco detectábel para unha cidadanía urbana inmersa no remuñío da sociedade consumista. Mais sen dúbida pronto será un motivo de inquietud para as administracións, os partidos políticos e o público en xeral como é hoxe para os ecologistas.

Non se trata de deixar a ningén ás escuras, nin de impedir o desenvolvemento urbano e industrial. Non se trata de reducir a seguridade que proporciona unha axeitada ilumi-

nación nocturna. Trátase simplemente de rendabilizar ao máximo a enerxía e de consumila con un criterio de eficiencia; de racionalizar o consumo eléctrico apantallando correcamente as farolas; de regularmentar as iluminacións sutuárias usando proxectores cara abaixo se é posible. Trátase de reducir a intensidade do alumeadoo público a partires de certas horas nas que a actividade na vía pública se reduce ao mínimo, etc.. Neste senso, ¿Por qué moitas zonas turísticas que quedan case despovoadas no inverno alumean as suas ruas coa mesma intensidade que na tempada alta?

A cidade de Tàrrega (Lleida) foi a primeira en elaborar unha ordeanza municipal contra a contaminación lumínica e para a protección do ceo escuro. Calcula-se en quince millóns de pesetas o aforro anual cando todo o sistema de alumeadoo público desta vila cumpla os criterios de eficiencia para unha cidade de doce mil habitantes. ¿Por qué non seguir este exemplo no noso concello? No século que vén adoitanse moitas medidas semellantes que vistas hoxe consideran-se avanzadas e progresistas. Temos que aprender á mocidade que só a moderación no consumo permitirá acadar o benestar nun planeta con recursos limitados.

Por todo isto, solicitamos que as autoridades municipais levan a cabo iniciativas para reducir a contaminación lumínosa e frea-la degradación do ceo nocturno.

Reclamamos que o Concello de tome conciencia desta problemática e aprove unha ordeanza municipal encamiñada a protexer o ceo nocturno como ben natural, ao que todos e todas temos dereito.